

Atuarfik pillugu Inatsisartut peqqussutaat nr. 8, 21. maj 2002-meersup allanngortinneqarnissaa pillugu Atuarfitsialammi tuluit oqaasiisa atuartitsissutigineqartarnerat qallunaat oqaasiitulli 1. klassimiit aallartittalernissaat anguniarlugu Naalakkersuisut suliniuteqaqqullugit peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Doris Jakobsen, Siumut)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerinnineq

Naalakkersuisut inatsisartunut ilaasortaq Doris Jakobsen tuluit oqaasiisa atuartitsissutigineqartarnerisa 1. klassimiit aallartittalernissaanik siunnersuutaanut qutsavigaat.

Atuarfik pillugu peqqussutip nutaap 2002-mi atuutilersinneqarneratigut tuluit oqaasiinik atuartitsisarneq 4. klassimut siuartinneqarpoq, siusinnerusukkut peqqussut naapertorlugu 7. klassimit aallartittaraluartoq. Siusinnerusukkut peqqussut naapertorlugu qallunaat oqaasiinik atuartitsineq 4. klassimit aallartittaraluartoq 1. klassimiit aallartittalersillugu siuartinneqarpoq.

Atuartut 2008-mi atuarnerminnik naammassinnittut tassaapput peqqussut nutaaq naapertorlugu atuarnerminnik naammassinnittut siulliit. Taamaattorli aatsaat 6. klassimiit tuluit oqaasiinik atuartinneqalersimapput. 4. klassimiit tuluit oqaasiinik atuartinneqartut atuartut siulliit aatsaat 2010-mi upernaakkut misilitsissapput. Taamaattumik Naalakkersuisut isumaqarput atuarfik pillugu peqqussut 2002-meersoq naliliiffigissallugu piaarpallaartoq. Maannakkuugallartoq takussutissartalikkamik ilisimaneqanngilaq peqqussutip siuliini taaneqartup atuartut ilinniartinneqarnerminni pissarsiarisimasaannut qanoq sunniuteqarsimanersoq, tassami atuartut taakku atuarnertik suli naammassisimanngimmassuk.

Naluneqanngitsut atuarfimmi atuartitsisunik ilinniarsimasunik suli amigaateqartoqartorujussuvoq. Taamaattumik tuluit oqaasiinik atuartitsineq atuarfik pillugu 2002-mi peqqussutikkut 4. klassimut siuartinneqarmat tamanna aamma isumaqarpoq meeqqat atuarfianni allamiut oqaasiinik ilinniartitsisunik pisariaqartitsinerulernermik. Pisariaqartitsineq taanna maannakkuugallartoq matussuserneqanngilluinnarpoq tuluillu oqaasiinik atuartitsinermik siuartitseqqinnikkut ilinniartitsisunik pisariaqartitsineq aamma sunnernerlunneqaqqissalluni. Taamaattumik Naalakkersuisut isumaqarput tuluit oqaasiinik atuartitsinermik siuartitsinerinnakkut atuartut inaarutaasumik misilitsinneranni angusaasartut qaffatsinneqarsinnaanerat qularnartoq. Akerlianilli Naalakkersuisut aarlerigisinnavaat oqaatsinik atuartitsinerup annersaa tuluttut atuartitsissussatut piukkunnarsarsimanngitsunit isumagineqassappat atuartut tuluit oqaasiinik atuartitsinermit pissarsiaat ajorseriartinneqarsinnaasut.

Ilinniaatsinut Institutip Ilisimatusarfimmiittup pilersaarusiortarpaa, ingerlattarlugu naliliiffigisarlugulu ilisimatusarneq tunngavigalugu ilinniartitsisunik allamiut oqaasiinik ilinniartitseriaatsinik ilinniartitseqqittarneq kiisalu ingerlaqqiffiusumik ilinniartitsersarneq. 2008-mi diplomimik allagartartaarluni ilinniartut holdit ataatsit allamiut oqaasiinik ilinniartitseriaatsimik qaffasinnerusumik ilinniarnertik naammassivaat, kiisalu 2008-mi ilinniaqqittut holdit ataatsit allamiut oqaasiinik ilinniartitseriatsimik masterinngorniarlutik aallartipput.

Ilinniaatsinut Institutip Ilisimatusarfimmiittup ilisimatusarneq tunngavigalu ilinniartitsinerup sania-tigut tuluit oqaasiinik ilinniartitsissunik tuluit oqaasiinik pisinnaasaminnik ilinniaqqikkusuttunik pi-tsanngorsaarusuttunillu pikkorissartitsisarpoq. Kiisalu Ilinniaatsinut Institutip ingerlattarpai tuluit oqaasiinik ilinniartitsissut misilittagaqarluartut pikkorissartinneqartarnerat, pikkorissarnermi qitiu-tinneqartarlutik ilinniartitseriaatsit nutaat. Tamakku saniatigut Ilinniaatsinut Institutip EU-p ataani suliniut Comenius suleqatigalugu Tuluit Nunaanni PILGRIMS aqutigalugu aasaanerani Tuluit Nu-naanni tuluit oqaasiinik pikkorissartitsisarpoq.

Allamiut oqaasiinik sapinngisaqalernissap pingaartuuneranik siunnersuuteqartup oqaaseqarnera Naalackersuisunit isumaqataaffigineqartorujussuuvoq, kisiannili Naalackersuisut aamma isuma-qarput ilitsoqqussaralugu oqaatsinik sukumiisumik atuartitsilluarnissaq allamiut oqaasiinik atuartit-sinermiit salliutinneqartariaqartoq taamaaliornikkullu atuartut ilikkagaqaqqinnissaannut ineriartoq-qinnissaannullu tunngavissiilluarluni – aamma oqaatsinik atuartitsinermi.

Naalackersuisut ilisimatitsissutigisinnaavaat, atuarfik pillugu Inatsisartut peqqussutaannut nassuiaa-tit naapertorlugit tuluit oqaasiinik ilinniartitsinermik ilisarititsinissamut kommunit periarfissaqareer-mata tamanna kommunalbestyrelsimit sumiiffimmiluunniit atuarfiup siulersuisuunit kissaatigineqar-pat, assersuutigalugu nukarlerni oqaatsinik pinnguartsinikkut. Taamaattumik periarfissaq atuute-reerpoq, sumiiffimmi atuarfeqarnermut oqartussaasunit atuartitsisoqarnikkullu tamanna akuerine-qarpat.

Kiisalu Naalackersuisut innersuusutigerusuppaat inatsisartuni ilaasortap Doris Jakobsenip Atuarfi-tsialak nalileqqullugu aammalu Atuarfik pillugu Inatsisartut peqqussutaata nr. 8, 21. maj 2002-meersup itisiliiffiusumik misissoqqissaarnissaanut siunnersuummik saqqummiusseqqullugit Naa-lackersuisut peqquneqarnissaannik Inatsisartut aalajangiiffigisassaattut siunnersuutaanut atatillugu akissuteqaat.

Naalackersuisut taamatut oqaaseqarlutik siunnersuutip Inatsisartuni akuersaarneqannginnissaa kaammattuutigissavaat.